





Daifim

An Official Organ of YMA, Khuangpuilam Branch.

YMA MOTTO


Hunawl hman that
Zofate hmasawinna ngaihtuah
Kristian nundan tha ngaihsan

Khawchin : Source - Accuweather.com



Khua a that rin a ni.
Temp - Max: 24°C Min: 13°C
Dar 6:05-ah ni a chhuak ang a,
Tlai Dar 4:49-ah a tla leh ang.

Tunkar chang vaww : I Petera 2:19
“Miin Pathian hriatna avangin tuar
loh tur tuarin lungngailhna a tuar
hram hram chuan chu chu pathian
lawmzawng a ni si,”.

TUALCHHUNG CHANCHIN

- ☛ Pu F.Lalhmingmawia (Amaw-itea) s/o F.Khuanga, Chawng-bawla Section chu damlohna avangin Aizawl lamah inenkawl turin phurh chhoh a ni a. Pathian tihdamna chang turin duhsakna kan hlan e.
- ☛ Pu Lalchuallova, Leader Vanapa Section chu mimal thil pawimawh vangin Halflong lam ah kalin a thang mek a ni.
- ☛ Tv Lalremruata(Rema) Secretary, Khuangchera Section chu a eizawinna thil a inzir belh turin tunlai hian Aizawl lamah a awm mek nia thu dawn a ni.
- ☛ Pi Zohmangaihi w/o Pu RVL Malsawma, Khuangchera Section-te chu chemo khai turin karleh ni 10/3/2021 a kala, a tuk ni 11/3/2021 a kir leh nghal turin an in buatsaih mek a. Pathian tihdamna chang ngei turin duhsakna kan hlan e.

CZS Cable Hriattirna
Khuangpuilam lam chawmtu khawl {Transmitter} dahna Current line (Transformer) a chhiat avangin TV a en theih hrih lova, P&E Department lamin line hi an siam mek a, a tha thuai turah beisei ila, mipuite hriatthiamna kan ngen e.

Sd/-
Sub-Operator
CZS Cable

VC Hriattirna
Khuangpuilam Village Council huam chhunga In sa tur reng reng chuan Khuangpuilam veng chhung a lo felfai a, hun kal zel turah changkanna kawng kan zawh zel theih nan In sak tan hmain bialtu VC hnenah kan In sakna hmun hma en fiah tura inhriattir theuh turin kan in ngenin kan in beisei a ni.

A VAWIKHATNA ATAN CHAPCHAR KUT 2021 VIRTUAL PROGRAMME A HMAN A NI.

Khuangpuilam the 7th March,2021:- Chapchar Kut 2021 chu COVID19 hrileng avangin kumdang anga lawm theih ni lovin, mipui him tlan nan kumin Chapchar Kut lawmna hi TV ah leh Youtube-ah live-a pechhuak in virtual a lawm a ni a. Covid-19 SOP zawm chungin Aizawl ah Vanapa Hall-ah mi sawm bik tlem te in hun an hman a. Chief Minister Pu Zoramthanga chu Kut Pa niin, Art & Culture Minister Pu R. Lalziriana chu Kut Thlengtu a ni.

Kut Pa Pu Zoramthanga chuan Chapchar Kut chu zohnahthlak khawvel hmun hrang hranga awmte min pawt hnaitu, hnam inpumkhatna atana rahbi hmasa a nih thu a sawi a. Kumin Chapchar Kut thupui, Zonun Zemawi: Thuawihna chu tun hun a kan mamawh tak nia a hriat thu a sawi a.

Chapchar Kut hawinna inkhawmah Live programme ah hian CYMA President Pu Vanlalruata pawhin thu sawi bawkin, Art & Culture Department Director Pu R. Hmingthanzuala chuan lawmthu a sawi a. Virtual (pre recorded) programme in chhunzawm a ni.



Home Department Thuchhuah
No.7698/2020-2021

Mi thenkhat, silai licence - a silai chawpin emaw, a silai tel lovin emaw - zuar an awm a hriat a ni a. Mi thenkhatin silai licence, eng silai mah la register loh pawh an zuar ni a hriat a ni bawk a.

Silai licence neitu ten silai licence nei tho midang hnen atangin silai an lei emaw an hralh dawn chuan valid licence an nei hve ve a ngaih bakah a leitu turin silai lei phalna a nei ngei tur a ni a. Chutiang mi te chuan an awmna District Magistrate phalna la hmasa in an silai lei emaw, hralh emaw chu an licence ve ve ah District Magistrate in an zia lut ngei ngei tur a ni.

Dan in a phal ang ni lova silai leh a licence zawrh te, licence chauh zawrh te, licence nei lo hnena silai hralh te hi Dan kalh a ni. Tin, mahni hminga licence nei lova silai kawh hi Section 25 of Arms Act, 1959 angin a rei 10 berah kum 3 lung in tan theihna a ni.

Hetianga Dan in a phal loh thil ti lui tu te chu an licence tih tawp sak an nih bakah Sawrkarin Dan angin a hrem ang.

Section 3 (1) of Arms Act, 1959 angin silai (fire arms) hi mahni hminga silai licence nei te chauhin an kawh thianga a; Arms Rules, 2016 hman a nih atangin mimalin midang silai retainer anga an kawh theih thin pawh tih tawp a ni tawh bawk.

KANGMEI LAKA FIMKHUR NAN KAN HRIATTUR
VC ram chhungah Prevention & Control of fire in the village (Ram) rules 2001 dan hnuaiah VC ten Rs 500/- an chawi tir thei a. Pawikhawih dan a zirin IPC lam pawhin hremna a pe thei- hei hi chu Police case a kalpui a nih in.

Tin, Forest area chhungah Kangmei ti chhuaktu hnenah hremna chu sec 24 of Mizoram Forest Act 1955 hmangin hrem theih a ni bawk. Chawi emaw, tan emaw, a pahnih in emaw a hrem theih. Tan hun chhung hi thla ruk thleng a ni thei.

Editorial Board :
Represent: Nl Florence Zoremsangi
Editor: Pu Lalsiamkima
Jt. Editor : Ricky MS Dawngzela
Treasurer: Nl Thanghmingliani
Cir.Manager : Tv. Samuel Lalpekhlua
Contact No: 9612761781 / 9612691291
9862501858 / 8575946381

FLS Station - 9612566886
Chawngbawla Section
 Leader : Tv R.Lalnuntluanga
 82599 60032
 Secretary : Pu Samuel Lalremruata
 9862094257
Vanapa Section
 Leader : Pu Lalchuallova
 87300 99599
 Secretary : Tv. Lallawmzuala
 87875 41803
Khuangchera Section
 Leader : Pu Lalramzaua
 76408 95924
 Secretary : Tv Lalremruata
 7005131514

Editorial.....✍
 HE TI ZAWK HIAN...!
 Engkim siana dintu Pathian hian a siam mihringte hi a duh ang taka a din leh a siam te kan ni a; mahse, chu a duh taka a din leh a siam mihringte ah chuan mize hrang tak tak, ngainat zawng leh ngainat loh zawng inang lo tak tak, an awm bawk. Kohhran leh khawtlanga inhmang tak leh mi tangkai tak an awm laiin, kohhran leh khawtlanga inhmang em em lo, hnawksak chuang si lo an awm bawk.
 Thil tha tih hi Van kan kaina tura thil tangkai tak ni mah suh se, Van ram kaina tura kan rin bul ber Krista-ah erawh chuan thil tha ti atana siam leh din kan ni thung si.
 Khawlaia rui buk buka au vak vak thin, Pathianni tuka Biak In thleng hmasabera tang thin an awm ngei ang. Saw pa saw, saw nu saw Zu in chungin/ruichungin Biak In-ah a lut a nia ti-a diriam taka tangkhum lo in; **he ti zawk hian..** ti-a ngaihtuahna siamin, Zu in mi ni chung a Pathianni zingah tal Biak In a thleng thin hi a tha asin, ni lo se chuan mitthi niin kan thlah liam tawh awm si a tiin.
He ti zawk hian.. tiin insela indiriam mai loin, fuihtu tha; zirtirtu tha ah tang thei theuh i la chuan kan vengchhung, kan khua leh kan ram neih chhun hi ram nuam takah kan siam thei dawn a lo ni; chuti chuan thil tha ti i la, thenawm tha kan lo nithei dawn a ni.

Branch YMA Office Bearer		
President Pu HD Daniala 9863212083	Secretary Pu Lalremsiana Varte 9862327112	Treasurer Pu David lalrosanga 9436158962
Vice President Pu S. Lalthangliana 89748 30454	Assistant Secretary Nl. Florence Zoremsangi 9612761781	Financial Secretary Pu Rotlingpuia 9862385193

Sub-Hqrs YMA
 Dt. 5/3/2021 (Zirtawpni) khan Kolasib Sub Hqrs. Hnuai a Group 2 (Serlui leh Sakawrhmutuai) ah SYMA hruaitu ten an hmanpui:
 Serlui Group YMA Conference wawi 10-na chu 5/3/2021chawhma dar 10 hian Bilkhawthlir Community Hall-ah neih a ni a, YMA Kumpuan 'Zirna uar' tih chu Group Vice President L Hmangaihzuala'n sawiin rorel a nih bakah SYMA kaihhruaiin hruaitu thar thlanna neih a ni bawk. Hruaitu thlan thar te chu:-
President : Pu Z Lalremliana Vairengte,
Vice President : Pu C Lalhmachhuana. Buhchangphai,
Secretary : Pu Aldrin Ralhrangluaia. Bilkhawthlir
Ass't Secretary : Tv Lalhruaizela Chhangte, Saipum
Treasure : Pu L Hmangaihzuala. Vairengte
Fin. Secretary : Pu Lalhmingaihzualla. Phainuam.
 Sakawrhmutuai Group YMA Hruaitu thlanthar te chu:-
President : Pu C. Lalngaihawma. Lungmuat
Vice President : Pu R. Laldingliana. Sentlang
Secretary : Pu K. Lalruatdika. Lungdai
Asst. Secretary : Pu R. Lalrinsanga Serkhan,
Treasurer : Tv. Lalremsanga Nisapui,
Fin. Secretary : Nl. Baby Lalrinfeli Lungmuat.

E-Newsletter ‘Consumer Virthli’ tlangzarh
 Wawiin khan Food, Civil Supplies & Consumer Affairs, Director Dr. Lalhriatzuali Ralte, IAS chuan Department in consumer te tana E-Newsletter ‘Consumer Virthli’ tih an buatsaih chu a tlangzarh a. He programme hi Pu Laltanpuia Hnamte, Registrar, State Consumer Disputes Redressal Commission (State Commission) leh Joint Director, FCS&CA Department ni bawk chuan kaihhruaiin, newsletter chungchang report chu Pu Lalrinawma Khalthang, JAO (Consumer Affairs) in a sawi a. He e-Newsletter hi Consumer te dinhmun chawikana a awm chhoh zel theih nan Consumer Welfare Fund atanga buatsaih a ni. He e-news-letter hi fcsca.mizoram.gov.in website atangin a download theih a ni.

CYMA hmalakna
CYMA CHETVELNA :
 26.2.2021: Central YMA bultumin Vanapa Hall-ah, YMA Kumpuan ‘Zirna Uar’ bawhzuina kawng khat atana Central YMA in lehkhahu ‘Kailawn’ a buatsaih tlangzarh leh Kumpuan chungchang infuih tharna hun hman a ni. He hunah hian Pu Tawnluia, Deputy Chief Minister chu khuallian a ni. CEC, Aizawl City Branch YMA ai-awh pathum theuh an tel a, Khatla Branch YMA in Reception, Ushering leh Refreshment an buaipui.
 1.3.2021: 46 Assam Rifles in Military Nursing Service (MNS) Pre Guidance Capsule opening programme an hmang a, Pu Joseph Vanlalhruaia Sailo CEC leh Pu Lalmachhuana CEC te an tel.
 2.3.2021 : E-in-C, PWD chu Central YMA OB leh Pu Danny Lalzarliana CEC ten a pisaah an kawm a, Mizoram hmun hrang hranga Motor kawng laih leh siam mek te tha taka thawh a nih theih nana hma lak dan tur an sawiho.
 2.3.2021: DSP, Anti Corruption Bureau (ACB) leh a naute Central YMA Office-ah an rawn leng a, Pu Vanlalruata President leh Pu H.F. Lalrinpuia CEC ten an lo dawngsawng.
 3.3.2021 : Chief Secretary Conference Hall-ah, 14-20 April, 2021 chhunga Fire Service Week hman dan tur chungchang meeting neih a ni a, Pu Roneithanga Fin. Secretary a tel.
 3.3.2021 : Synod Committee room-ah MPF Gen. Hqrs. Board Executive meeting neih a ni a, Pu Vanlalruata President a tel.

CENTRAL YMA THUCHHUAK
 Mizoram hmun hrang hrangah NABARD tanpuina Rural Infrastructure Development Fund hmangin sikul engemaw zat sak mek a ni a. Sikul sak hnate kut tling taka thawh a nih theih nan hma la theuh turin thawktute kan ngen a ni.
 Sikul sak hna thawh mek hmun thenkhatah kut tling lo a hna kalpui a awm hi Central YMA chuan paw i a ti hle a. Zirna uar kumpuana kan neih lai a ni a, dik taka hna thawh a nih theih nan YMA chuan hma a la zel dawn a ni. Hmalakna kawngah Mizoram sawrkar leh mipuite tawiawmna kan ngen e.
 Sd/-
 Prof. LALNUNTLUANGA
 General Secretary, CYMA

(Thu ziak Huang) *- David Lalrosanga*
I ngaihtuah ngei em?

Kan veng hi veng naupang te niin kan indan aṭang pawhin kum 7-na a vei mek chauh a ni a, hetih chhung hian thlanmual lamah erawh lei dânin kan inthlah liam ve zel bawk a, kan indan hnuah ringawt pawh mi 64 lai chu kan in vui ve ta reng mai.

Thih hun hi tu duhthlan theih mah a ni lova, thih danah lah, thihdan changkang ti a hmasawn tum vak ngaihna a awm chuang der lo. Thihna hi Pathian ruat kan ti chawt zel a, a dik berin i hria em? Thihna hmasa Eden huan a thihna kha Pathian ruat a nilo Chiang a, mihring khan a ma duhthu in thihnaah khan a inbarh lut mai a ni. Thih danah hmasawn ngaihna a awm loh lai in thih hunah chuan hmasawn theihna tlem kan nei :

Kan Hmangaih kal ta te zah em em chungin heti zawng hian ngaihtuahna i han seng chhin teh ang.

1. Mipa aiin hmeichhia an dam rei zawk : Kan veng a mitthi 64 kan neih zingah hian hmeichhia 20 chauh an nih lai in mipa 44 lai zuk awm a mawle, kan damrei hun chhung hi Bible in kum 70 a tih lai in kan thlah liam tak te kum chawhrual hi hmeichhia kum 56 leh mipa kum 52.43 chauh a ni mai, eng vang a mipa thi hi tam em em nge kan nih le? Chhanna tam tak awm thei zingah, langsar tak chu mipa te hian ei leh in, zuk leh hmuam leh ruih theihthilah hmeichhia te aiin kan insum thei lo zawk tih hi a ni awm e, nang i pawm zawng a ni em?

2. Kan veng hi naupang seilenna atan veng hrisel tak a ni : Mi 64 kan thlahliam zingah hian kum tlinglo (Kum 18 hnuailam) pahnih chauh kan nei hi thil lawmawm lam a ni, heng mi pahnih te pawh hi natna vang nilo, chetsual thil (accident) vanga boral an la ni lehzel a, chuvangin kan veng boruak hi naupang tan a ṭha a, Damdawi In hlat ber veng ni mah ila, kan fanau te hriselna kawngah kan enkawl ṭha hle tih a Chiang a a lawmawm takzet a ni. I chhonzawm zel ang u.

3. Upa lam thlir ve ila : Kum 50-70 inkar thi hi mipa 9 leh hmeichhia 6 kan nei a, kum 70 chunglam thi hi mipa 11 leh hmeichhia 6 kan nei tawh heng zingah hian kum 90 dam thleng hi 3 lai kan nei a ni. Mi 64 zingah Bible in mihring dam chen a sawi thleng pha mi 17 chauh kan nei hi thil Ropui tak a ni lem lo. Amaherawhchu, heti zawng hian ngaihtuah chhin ila, kum 50 chunglam thi hi 32 niin kum 50 hnuailam thi hi 32 chiah an ni ve bawk a, a zahve lai in kum 50 min dam thlenpui tihna a ni.

4. Ṭhalai Lu ti hai tu : Kum 30 hnuai lam thi 6 kan nei a, kum 50-70 inkar 15 kan nei bawk. Mihring ten kan chak vanglai tak kum 30-50 inkar thi hi mipa 20 leh hmeichhia 6 lai kan nei mauh mai, ava lungchhiat thlak em! Mipa kum 30-50 inkar chu nupui nei lai angin chhut ta ila, hmeithai 20 kan neih belh a, fahrah (pa neilo) phei chu engzat tak awm ang maw!

Hawh u, beng sikin ngaihtuah teh ang u. Hmeichhe let ai tam mipa kan thih zel si chuan, kan hmeichhia te hian mipa hi an la inchan dawn lo, Mizo chi kengtu mipa te kan ral zel si chuan Mizo hi kan ral mek a ni. Tuma chim ral loh hian kan la thi mang mai ang tih hi a hlauhawm ta, rawlthar leh tlangval te u tan han la teh u, thihna hi a mahin a lo thleng ngawt lova kei mahni in kan pan mai ṭhin tih hre rengin kan kawng tur thlang fimkhur ang u. Kan thlanmual bihchianna :

1. Phum tawh zat - 64 (Mipa 44, Hmeichhia 20)
2. Kum chawhrual -Mipa - 53.42 ; Hmeichhe - 56
3. Kum tling lo- 2
4. Kum 30 hnuai lam - Mipa 2; hmeichhia 2
5. Kum 30-50 inkar - Mipa 20 ; Hmeichhia 6
6. Kum 50-70 inkar - Mipa 9 ; Hmeichhia 6
7. Kum 70 chunglam - Mipa 11 ; Hmeichhia 6

(Naupang Huang)
Saichawnkhupa

Mizo zinga hmelchhe bera an sawi thin Saichawnkhupa hi Hmar hnam niin an sawi. Kan pipute hunlaia an khaw lian leh ropui ber Selesih khua, in sangsarih zet tlinga an sawi ṭhina tlangval hmelchhe ber a ni a. A hmelchhiat em avangin tuman pasal atan pawh an duh lova, nupui tur hmu zo lovin a thi ta nghe nghe a ni. A chanchin sawitu ṭhenkhat chuan a hmelchhiat em avangin nula tumah a lam hawi in nuih pawh an nui duh ngai lova, a chhiat lulai em avangin vawkte hian a chaw pek pawh an ei duh ngai lo e an ti hial bawk.

A hmel hi a chhe em em mai a, hmel a lawi pawh nei lovin a bawk kaw sawr bawl ṭuk mai a ni awm e. A hmelchhiat em em piah lamah a ha a la kuh zui bawk a, a ha hi a kuh em avangin a hmui vun pawhin a khuh seng lova, a hmui in a khuh bak pawh sei fe a la lawr a, dawnfawh a laia phel phawh hi thil dang ruai miah lovin a dit zo vek thei a ni. A nuih ve te lah hian a heh chu a hahni lawk laiah a tang tlat ṭhin a, amahin a chhuk thla leh mai thei lova, kuta pawh fat fat hnuah chauh a siam rem theih chauh ṭhin a ni. Inring lawk fe lo chuan za takin a nui ngam ngai lo.

Vawikhat pawh Sikpui kut an hman ṭumin inring hman lo lekin a nui ve chiam mai a, a hmui chu a hahni lawk laiah a tang ta tlat mai a, a pawt thla leh mai thei si lova, an bul a miten theihtawp chhuahin an pawhpui a, rei tawh tak an pawh fat fat hnuah an siam rem thei ta hram a. A hmelchhiat piah lamah a ha kuh hi a buaipui hle a, a ha hi a hahni aṭang hian a kawhin a rawn kawh chhuak vuah mai a ni.

Tlangval ve na fam chuan nula hmel duh zawngte pawh an nei ve ṭhin a. Nula ho lahin min ngaizawng palh ang tih hlauvin a lam hawi tak ngial pawn an nui ṭha ngam lova, ngaihmelh chu sawi loh an mitsir tak ngial pawn an melh tha ngam ṭhin lova.

Ṭumkhat chu Sikpui kut an hman ṭumin nula kawppui tur a sawm kual ve a, Sikpui kut an hman hian tlangval ten kut hmanpui tur nula an sawm ṭhin a, tlangval hnahkhat ni ve ta reng ruang chuan kut hmanpui tur nula a sawm ve a ni. A tirah chuan a hmel duh ve deuhte chu a sawm hmasa a, anni lah chuan mawi hnai taka lo hnar nan Thirkhai an lo pe a, an khaw nula zawng zawng a sawm kim vek hnuah pawh kut hmanpui tur nula sawm chhuah tur reng reng a hmu zo ta lova. Nula ho lahin thirkhai an lo pe zel hlawm a. A thinrim tihngaihna hre lo chuan an thirkhai pek khawm chu a so belhbawm ta ngawt a. A thirkhai so belhbawmna tlang chuan Thirhlum hming a lo pu ta a ni. Hetih hun lai hi Phullen leh Zawngin inkar vela an awm lai a ni awm e.

Saichawnkhupa pa chuan nupui a hmuh zawh loh mai a hlauh pui a, Saichawnkhupa hnenah chuan, “Bawiha, I hmel hi chuan nula tumah i rimthlu zo dawn lova, taimak zir la, buh leh bal thlo chhuak ṭeuh la, faisa ring turin I nupui tur zawng ila hmuh pawh kan la hmu mahna le” a ti ta ngawt a.

Tichuan, taima taka hnathawh chu a tum ta a. A hlo thlawh chhung zawng pawh chu in lama hawng miah lovin ramah a riak ta ngar ngar mai a. Leilung lan theih chhung zawng hlo a thlova, ṭhahnem a ngaih zual chan deuhte phei chuan meichher eng hnuaiah te hlo a thlo ṭhin a. A mut pawhin a diar pawh a phawh ngai lova, a diarah chuan hlo a ṭiak ṭhat a. A hmai ni se phih fai ngai hek lo, a bal khawm bing zung mai a, ṭhenkhat laiah chuan pasi a ṭo ṭhat mai a ni an ti.

(Chhonzawm tur)

Mizo Dan leh Hrai

MIZO HNAM DAN (Mizo Customary Law)

Published by Law & Judicial Department, Government of Mizoram. 1st Edition 2006.

BUNG - 3 : NUPUI PASAL INNEIH THU

Chang 53 - TLAN DUN : Mipa leh hmeichhia, inneih duh, nu leh pate hriatpui lohva anmahni awmna in ni lo, hmun dangah awm dun sela, 'Tlan dun' an ni. Tlan dun innei zui chu hmeichhe man tlaian a pung. Chang 36 sawi anga inneih thatna a awm loh chuan inneia pawm a ni lo. Sumchhuah pawhin tlan dun vanga man punna 'tlai' kha a chhuak ve lo.

Chang 54 - LUHKHUNG/FAN : Innei tura nu leh pa remtihna awm lova, mipa hmeichhe ina a pasal nih tuma lut hi 'Luhkhung' a ni a. Hmeichhia mipa ina a nupui nih tuma lut hi 'Fan' a ni. Hetiang titu tan hian mualphothlak tak a nih avangin man leh mual a nghawng thin. Mipain a luhkhung chuan a nupui man tlaian a kiam a, hmeichhiain a fan chuan a man tlaian a pung thin.

Chang 55 - MAN LOVA INNEI : Nupui pasala inneih dawna man leh mual awm lo tura palai hmanga mipa chhungte leh hmeichhe chhungte inberema innei hi 'Man lova innei' a ni.

Chang 56 - MAN BO : Hmeichhia pasal nei tawh, sumchhuah emaw, uire emaw avanga inthen tawh hnuin, a lunglen vangin emaw, chhan dang vangin emaw man pawh phut lovin, nu leh pa remtihna pawh awm lovin a pasal inah lut leh ta sela, 'Man bo' a ni. Chutianga lut leh chu nupa dik tak a ni leh a; amaherawhchu, hmeichhe chhungten man an thing thei tawh lo. A bungraw chhawm erawh chu an chhuhsak thei a, an tuithlar thei a, an insiamrem leh thei bawh.

Chang 57 - MAN AIA MA TELTU CHAWM : Man aia inchawm hi, in khata awm hovin emaw, in hrang atangin emaw a inchawm theih a. Engtikawng pawhin inchawm se, inchawm hlum loh chuan man tlaka ngaih theih a ni lo.

Chutianga inchawm mek chu inngeih lohvin, hmeichhe lam duhna avangin an nupa chu inthen sela, kum thum aia tam lo inchawm tawh an nih chuan, hmeichhiain mipa hnenah man zatve a pe ang.

Hmeichhia chu uire a nih chuan dan pangngaiin a pasalin Thuam leh Bungrua pawh a hreng thei. Mipa lam duhna avanga inthen an niha hmeichhia chu a pasal laka 'thisen pal' a nih chuan, kum thum lai an inchawm tawh bawh chuan, a man zatve tlaka ngaih tur a ni a, a bak chu chang 37(1) a hmeichhe man bithliah dan chu tehnaa hmangin a zatve a pe tla tur a ni. Thisen pal lova a thih chuan chawm zui a ngai lo va, engmah dang sawi theih a ni lo.

Chang 58 - MAN KIAM THEIHNA CHITE : Hmeichhia pasal nei tur man, Tlaia a kiam theihnate chu hetiang hi a ni:

- 1) Lamthlang rapthla : Pasal sun vanga kir.
- 2) Hringkir : Pasal nei, pasal ina fa sun emaw, nauchhiat emawa kir leh.
- 3) Lingleh : Pasal nei, fa nei lova kir leh.

Chang 59 - SEHRUI SAT CHAT : Innei tura miin thu an thlun fel vek tawh hnuah mipa dangin hmeichhia chu neih zawk tumin an inneih tithulh sela, 'Sehrui sat chat' a ni.

Sehrui sat chattu chuan a sehrui sahchah chhan hmeichhia chu nei ta sela, a nupui man chu Sial (₹ 40/-) in a pung ang. Sumchhuah pawhin sehrui sahchah man chu a chhuak ve lovang. Mipa chuan a neih duh leh si loh erawh chuan, nupui man zat Sehrui sah chah man a chawi ang.

Chang 60 - KHUALKAI : Nulain khaw dangah pasal a neih chuan 'Khualkai' a ni.

Chang 61 - CHHUATKIL KAI MAN : Hmeichhiain a laichin bul ni lo, midang in atangin pasal nei sela, a in neitu chuan chhuatkil kai man tlai, pa chan atangin a tel thin. Sumchhuah leh uire vanga inthenah chhuatkil kai man chu a chhuak ve tur a ni lo.

(Chhunzawm zel tur)

Hriselna Huang

Tui leh Hriselna chungchanga thuchah

1. Kutsilin sahbawn nen uluk takin second 10 vel tal nuai tur a ni a, chu chu puan ro emaw lehkha thianghlim emaw, a hrukna tur bika siam emaw in hruk hul leh tur a ni. Puan balin hruk loh tur.
2. Mit, hnar leh ka khawih hmain kut sil thin tur a ni, a chhan chu heng te hi natna hrik luhna ber an nih vang a ni a, a theih chhung chu T-zone an tih mai Mit, Hnar leh Ka hi kut fai lo chuan khawih loh tur a ni.
3. Ei leh in tur kan siam dawn reng rengin kut sil hmasak ngei tur a ni a; Nau chaw pek dawn pawhin kut silfai tur a ni. Zun leh ek zawhah reng reng kut sil bawh tur a ni a, damlo kan buaipui pawhin kan puih theih dan dana kan puih hnuah kut sil fai leh ngei tur ani bawh.
4. Taksa leh silhfen vawnfai hle tur ani a. Tin, kan kut leh ke tin te, ha leh beng leh hmai leh sam te fai taka enkawl bawh tur ani. Pheikhawh leh silipar bun that hian natna hrang hrang laka min veng hle bawh.
5. Mihring leh ran ek te hi tho bawm theih loha siam tur ani. Inthiarna khur nei chi hman tum hram tur a ni a, inthiar zawhah kut sil leh ngei tur ani bawh.
6. Hmai fai taka phih thin tur ani a, zing leh tlaiah tui leh sahbawn nen ngeia hmai phih thin a tha, thoin a bawm pheichuan chu tih ngei a tha.
7. Kut bal chungin No leh ei leh ina hman tur chi kawih loh tur ani.
8. Ni eng hian tui a ti thianghlim ve thei a, Plastic bottle chhunga dahin Ni eng hnuaiah darkar 6 tal dahin in atan pawh a thianghlim tawh a ni.
9. Bungbel kan sil zawh hnua ni eng hnuaia tih ro hian natna hrik a pumpelh tha bik.
10. Tho laka kan in leh a vel te, kan khawtlang hrim hrim a lo thianghlim zawk nan, bawhlhlawh kan dah mai mai tur a ni lo. A dahna tur bik siam emaw anih loh chuan halral emaw phum bo emaw a tha.

Hriatzauna Huang

Toothpaste awm hmain engtinng ha an lo nawh ve thin?

Chhanna : Hmanlai mi tam tak chuan hnimhnah kut khat tunin an hmuam a an nawt mai thin a, chumi hnuah toothpaste ang deuhin chalk leh zun (urine) chawhpawlh hman an ching ve leh.

Rannung tui leh khawmuala cheng kawp thei chi hi eng nge an vuah kha?

Chhanna : Amphibian. eg:- Uṭawk. Khawvela uṭawk lian ber chu goliath frog a ni a, Central Africa-ah an cheng a, cm 87.63 laia sei leh kg 3.66 laia rit an ni thei.

Simeikhu (comet) hi mei alh eng tak angin kan hmu thin a, meialh hlawm tak tak em ni?

Chhanna : Ni lo ve, Simeikhu hi a chhungril (nucleus) chu lung, vaivut leh vûr awm khawm a ni! A mei pawh hi vaivut leh boruak (gas) inpawlh a ni a. Simeikhu lian ber pheichuan 160 maktaduai kilometer laia sei mei a nei. Meialh leh eng mawi taka a lanna chhan chu Ni eng sawkhawh (reflection) vang a ni zawk. Amah tak hi chu vûr inhlawmkhawm a ni a, a hranpain enna a nei lo.

Simeikhu (Halley's comet) hi kum engzat danah nge kan hmuh thin?

Chhanna : Kum 76 danah Halley's comet hi a lang thin a, Kum 1986 khan a lo lang a, kum 2063-ah a lo lang leh ang. Simeikhu kum 76 dana a lan tur hi Edmund Halley-a'n kum 1682 daih tawh khan a lo sawi lawk tawh a ni.